



₹ 5/

तुबारि

www.pangi.in

अब अंग्रेजी, हिन्दी त
पंगवाड़ी भाषा अन्तर असी।

Issue 70; 04/01/2018

बिषय सूची

1. टाई नकम्ममे पंडित 1
2. मीठि बोके 2
3. बुटे की असे? 2
4. बिड़ी सरगट ना पीए। 2
5. ई 2
6. पांगेई बारे कुछ बोके 3
7. रिश्ता 4
7. शहीदे अखिरी बोके 4
8. चुटकुले 4

टाई नकम्ममे पंडित

यक रोज किछ पंडित जे अपफ पुठ सुआ रोभ किदतेथ दूर देश जे घेण लगो थिए। घंते-घंते से रामू ग्रां पुजे। तठि घेई कइ से पुछुण लगे कि “इस जगाई कोउं सोबी केईया ज्यादा बुद्धिमान असा?” तोउं तेस ग्रांए मेहणु रामू तेन्के समाणी अणहता। तोउं तेन्हि पंडिती बुचा यक जेई तेस केईया पुछुण लगा, “धरती सुसुर बुच कोठि असा?” रामू बोता “में सुमले कनारी थुरी बुचा।” “पेहला पंडित पुछता “तोउ केई की सबूत असा।”



रामू बोता, “अगर तु विश्वास ना कता त नाफ कइ हेर।” पर पेहला पंडित केई तसे जबाव न थिआ। से चुप भोई गा।

तोउं दोका पंडित पुछु, “अम्मर अन्तर कत तारे असे?” रामू बोलु, “जेति में खचरे रले असी, अम्मर अन्तर तत तारे असे।”

दोका पंडित बोता, “तोउ केई की सबूत असा?”

रामू बोता, “अगर तोउ मोउं पुठ विश्वास नेई त गा में खचरे रले गिण कइ हेर।”

दोका पंडित बोता, “ए सोब बकवास बोके भींथ। कोउं जेई खचरे रले गिणण बिश्ता।”

रामू बोता, “अच्छा! त कोउं जेई ई असा, जे तारे गिण सकता। अगर इ बोक बकवास भो त से बोक बि बकवास भो।”

दोका पंडित इ शुण कइ चुप भोई गा।

टेका पंडित रामू जबाव शुण कइ लेहरी गा, त बोलु, “तु अपु खचरे रले गिण सकता ना कि कति असी। त तु मोउं जे बोल कि तें खचरे पुछणी रले कति असी?”

रामू बोता, “आँ, में खचरे पुछणी रले तति असी, जेति तें दाढ़ी बाइ असे।”

टेके पंडिते बोलु, “तु कीं साबित कता।”

रामू जबाव दुतु, “अउं आरम जुएई साबित कइ सकता! ए सुखतु असु। अगर यके टेम अन्तर में खचरे पुछणी रले त तें दाढ़ी बाइ खतम ना भोल त फि अउं मान घेन्ता कि अउं गलत असा।”

पर टेका पंडित राजि ना भुआ। त ग्रां बाड़ी बोल छउ कि रामू सोबी केईआ अकलदार ता बुद्धिमान असा।”



हैं पता:

तुबारि पत्रिका
हरी जरनल स्टोर,
किलाड़,
त: पांगी घाटि,
जिला: चंबा,
हिमाचल प्रदेश।
पिन. 176323



अपु लेख, विचार, कथा,
कविता तुबारि अन्तर
छपाण जे दुतो पता पुठ
लंघाए।

तुबारि पढ़णे वाड़ी तुबारि टिमे
कनारा नोई साले मुबारक। तुस
सोभ मेहणू फियूड ई फुलो
लोते, दुबी ई बासो लोते।

क	वा	स	क	रे	ल	प	ट	ट	ण
फा	ट	ब	श	म	व	म	बि	ई	गो
कु	फं	अ	स	न	क	न	क	खा	टे
पु	श	पा	र	पुं	ठे	गा	तु	बा	बा
न	क	द	च	थ	गु	ण	खा	उ	उ
क	न	म	चु	री	ज	म	त	ब	क
र	स	ल	श	ए	न	क	बी	रा	था
कं	श	रो	इ	मे	नी	णी	री	व	थ
स	उ	न	मु	श	ब	ल	ला	ण	रो
ब	जा	उ	ली	शु	न	उ	भो	न	श

मीठि बोके

जीतणे लिए जे बि चीज असी, त से भो परेम। पीणे लिए जे बि चीज असी, त से भो लेहर। खाणे लिए कोइ चीज असी, त से भो गम। देणे लिए कोइ चीज असी, त से भो दान। हरालणे लिए कोइ चीज असी, त से भो दया-धर्म। नेणे लिए कोइ चीज असी, त से भो ज्ञान। बोलुणे लिए कोइ चीज असी, त से भो सच्यु। रखणे लिए कोइ चीज असी, त से भो इज्जत। फटाणे लिए कोइ चीज असी, त से भो जड़ाण। छड़ देणे लिए कोइ चीज असी, त से भो मोह-माया।

बुटे की असे ?

ए जमदार के चुर के जोटणे जुण भिंत
ए मछवारी के दीरोड पार टपाणे कशती भो
ए गबाले बकरी के दिसास भिंत
ए मिस्तरी के मेज भो
ए ग्रांए के खांजे बाणाणे कठोड़ भिंत
ए धुप किया बचणे बोझ भिंत
ए मेध कियां बचणे छतरोड़ भिंत
ए गभुर के खेलणे दांग भो
ए पखूर के त बंनुर के गी भिंत
ए हे सोभी के बगी के जन बोही कियंया रोकते
ए असी सोभी जे मोटी छापीरी भिंत
पृथ्वीए दीसे तेस धुप कियंया बचंता
ए हें पृथ्वीए भाश भिंत
बुटे हवा बणाणे कम कते जे अस सांस नेते
बुटे हें जीनी सांस भिंत



नमः कृषि वर्मा कक्षा चौथी रोल न. यक
सकूलः सैरी भटोस

बिडडी सरगटी त अराख

ना पिए

बिडडी सरगटी के बेलि हें भाश अन्तर रोग भुंता। पर आजकले गेभुर ना मान्ते। तेन्ही हें बोके बुरी लगती किस कि तेन्ही लगतु कौड हें बारे बुरु बोते। पर तेन्ही ना भुंता पता कि से हें बारे कुछ ना चाहंते। आज कल सोभी फिल्मी त मेथुरी बट बी ए बोते की बिडडी सरगट ना पिए। तेसे बेलि तुसी केनसर भुंता। सरगटे त बिडडी डेबुड़ बट कती डुरोणी फुटो लोओ असी। फि बी तुस किस नेइ मानण लगो। मेहणुओ! तुस कपल सुधारते। यक टेम ई एण असा कि कुआ त बुड़ा साते बिश कइ बिडडी सरगट त अराक पिंगे। तुस कि ई चहांते ना कि तुं गेभुर तुसी जोई बिश कइ अराक बिडडी पिए।



यक टेम थिया कि जीण मरण विडडी त सरगटी के बेलि मेहणू यक त सुआ नुकसान भुंताथ, दोका त जे बचारे मेहणू ना पीतेथ तेन्ही बी तेंके तु मजबुरी अन्तर पीण एंता जे बचारे बमेरी बाड़े भुंते। तेन्ही सीती मुशकल भुंतीथ। पर होरे से कोडीया मानते। हें पांगेई किछ किछ जगही त आती सुधीरी गओ असी ना कि जीण मरण जेन बी जमदारे अन्तर बिडडी पी त तेस 500रु डान देन एता। से त यक पुरा बेडीया रुल बणाओ असा। तिहांणी रुल सोभी जगही बणो लोता जेणे बोली की हें पुरी पीटी सुधीरी सकिएल। एचेली अब हें पुरे पांगेई अन्तर फिर टाजोटी के त गरंओटी के टेम आओ असी त तुस ई एन्ही बोकी बट बोक कइ सकते जेसे बेलि की तु धन त तु जन बी सुखी रेही सकिएल।



बो ना कि अपु हाते बइ अपफ जे मोत खेरीदीं। से बोक हें चद एंती अब किस कि 100रु यक बोटल अराखे पीणे बेलि केसेरी जीनी नाश भोई सकता, किस कि हें पांगेई अब 3,4 महेन बोटे भारी सक्त एंते मथलव की बोदु भारी ठानु भुंतु, जेसे बेलि कि हर साल हें पांगेई 20,30 मेहणू मरते। त तेंके सोभ टब्बरा बचरा बरबाद भोई घेता। तुसी पता भोल कि केसेरी गी अगर पुरश ना भुआ त तेस टब्बरे जिल्हेणू कती मुशकिल भुंती अपु टब्बर पाड़णे। इसलिए तुसी कियंया हथ जोड़ी कइ छानेआरे कते कि तुस विडडी सरगट छड़ देणे कोशिश करे। तुस त तुं धन तेसे बेलि बच रहेंता।

ई

ई त भो से तेसे प्रमे सचा असा।
एसे बजन जीणे सोच सच्ची नेई।
ई त प्रेमे मुर्ती भो।
एथ अन्तर बासो असी देवी सूरत।



ई से भो जेसे कोई परिभाषा नेई।
एस कियंयां दूर बिशणे चेता असी तीं तड़पतां।
एसेरी दिल अन्तर त असा प्रेमे दिरीयोड।
ए न समझती कोउं में त कोउं पराया ईए ऋण कोई ना चुकाई सकता।
ईए खुरी पहाण असा स्वरगे सुख।
ई त भो जेसे प्रेम सचा असा।
एस बजन जीणे सोच सच्ची नेई।

नउ सरला कुमारी

पांगेई बारे कुछ बोक

सोबी कियां पेहला किलाड़े सैरी भटोस ग्रां कियां बतांता। पुराणे टेम हें भटोस चोउरे टोल थीए। यक टनवाणीए, मीसरीएणीए, देलवाणीए, धेतवाणीए। पेहला बोते भटोस लियोस गोट धे थी। यक पुराणी बोक भो कि तेठीयां कुफ ठाकुरे जे ब्याहा थिया। त तेठी केहु बोलो थी 'अगर इस घर पहाण दुई नागारे यक साथ मिए त तुसी एठीया घर उजाड़ ऐंता।' कुरदीती, तेस कुफ ठाकुरे कियां बी नागारा आ दे तेठी चुल बठ होरा नगारा टाई छ। केहु बलाए बेश अओ थिया। तेन से दुहो नगारे तेठी चुल बठ बाने दे बोलू कि 'तुस ईठया नशी घीए।' तोउं से तेठीया नाशी गे त भटोस एई कइ बासे। आज हें ग्रां लगभग 36 टोल भो असे।

1. देहेरी के बारे:-

सोबी ग्रांई केसे ना केसे देवी या देवती के देर पका असे त ग्रां सोब मेहणु अपु अपु कुल देवती के देहेर हर धेनीसे घेंते। ए देहेर सद हिंयुत टाई महेन बन भुंते। उटेणे धेनीस कियां त लिथु धेनीस तकर तेस सोबी देहेरी के टोई खुलती त सोब मेहणु तेस देहेर घेंते। तिएस सोबी कियां जादे मेहणु पुंठो भुंते किस कि मेहणु पुन्ठे जे दिया घीन घेंते। त तेठी सुआ मेहणु भुंते। होसण देहेर आठभारोए खुलता। तिएस तेठी सुआ हुसुड़ा भुंता। तोउं माता कुटासणी देहेर बी खुलता। किरयोती पुनीहरे देहेर बी लिथु तिएस खुलता। कुफ माता सिंघेसनी देहेर बी तिएसे खुलता। कवास नाग नियोकने त चोनी देर बी तिएस खुलता तेस भटोस पनीहारे देर बी तिएस खुलता।

पांगेई सोबी कियां जादु मन्हले माताई, सिद्ध मन्दिर "बुनी देहेर", मलासण माताई, माता माल देई, बेलीणु बेसनी, शीतला माताई मानते। तीं त पुरे पांगेई भरी देवी देवते असे, पर सोबी किईया जादे मेहणु इन्ही देहरी घेंते। पांगेई सोबी कुणी देहेर असे।

2. रोड़ी के बारे:-

यक टेम पुरे पांगेई यक बोक बोते कि कुई त उव्वार कियां पार देण ना, त भीए पेर कियां ते देण। ए यक बोक पुराणे मेहणु किस बोलो भोल भला? किस कि पेहला मेहणु यक जगही कियां होर जगही जे घेण केतु टेम लग घेंतीथ। तोउं त से तीं तीं उजबाण बनातेथ। तेनी टेमी हें पांगेई रोड़ी बते नेओथ। तोउं त पेहलकणे से मेहणु कुरहे दूर कुई देण हेर इरतेथ त बोतेथ कि जे जगहा कुस्तुरी लगतीथ तेस बात घोड़ फटाई छांण त दुबारी तेस बात न घेंतेथ। तेती कुस्तुरी बते भुंतीथ, जेठी की मेहणु जान बी घेई घेंतीथ। आज हें पुरे पांगेई कुछ 3, 4 ग्रां भोल जे रोड़ जोई नेई मियो। बाकी त सोबी ग्रांई जे रोड़े बणो असी। आज हें पुरे पांगेई 40,50 त बाईक भोई गो असी। त लगभग 50,60 कियां त जादी गाडी भोई गो असी।



3. गोठी के बारे:-

पुरे पांगेई अन्तर सोबी ग्रांई के अपु अपु गोट असे। से पुरे वारशाढ़ भइ गोठी बिश्ते। गोठी बिश्त किस? बास्ते डेडुइ त गोरु अन्तर खा कते त से अपफ बी लुगरी के बेलि कमजोर भोई गो भुंते। ता तेंके बेलि जादु हेटींतु बी नउ। त तेस बझाई जोई तेन्ही गोट धें नेन्ते। गोरु लेहु धनीस जे गोरु जे नेन्ते त कोई कोई नधोई पात 18,20,22 गोट कइयां गी जे आणी छांते बाजी बाजी आलुए धेनीसे तिस बाजी बाजी टेघु जाट जे बी गोट कइयां गी जे एन्ते। सुराल बणे त जाई कोई फुल्याटी 6,7 गी धे एन्ते।

उ बिजली बारे:-

बिजली हें पांगेई अब त 4,5 बिजली पावर हाउस भोई गो असे। एनी बुच यक पावर हाउस आतो बिजली देंता कि से अधो शुद्ध पांगेई बिजली देंता। से पावर हाउस साच असा, किस कि तेसे बिजली पुर्थी कियां त करेस तकर असी।

सोलार प्लांट:-

इस फेरी हें पांगेई सोलार प्लांट बी दुतो असे। त तेसे बेलि बी आधो-शुद्ध ग्रां बिजली फेदा नेण लागो असे, जे कि यक किलोवाट बिजली देंते। एसे बेलि 9,10 टोल बिजली आपु आपु गी लाई सकते। सद यक यक बलब यक टोल त तेन बइ टि.वी. बी हेर सकते।

ऊ लिखतरी के बारे:-

पुरे पांगेई तुसी लिखतरी बाड़े घोड़ मेते। ए घोड़ सोबी कियां जादे तुसी तेठी मेते जेठी पुराणे टेमी पाणी पनीहेरे भुंते। तेठी सोबी केइयां जादे मेते। ए लगभग 1100 साल पुरणे असे।

रिश्ता



जिन्दगी पिछाण भो रिश्ता,
सुखे-दुखे महरवान भो रिश्ता।
कपले जुड़ते त कपले टूटते ए रिश्ते,
कपले मिते त कपले उशकते ए रिश्ते।
कपले धुप त कपले शोलियार ए रिश्ते,
जिन्दगी पिछाण भो ए रिश्ते।
कपले खुशी घिन कइ एन्ते ए रिश्ते,
कपले गम साया बण घेन्ते ए रिश्ते।
कपले डुबणेवाड़ी सहारा देन्ते ए रिश्ते,
कपले अपु तन्हि बि बेगाना बड़ाई छते ए रिश्ते।
कपले धुप त कपले शोलियार ए रिश्ते,
जिन्दगी पिछाण भो ए रिश्ते।
कपले हसंते त कपले रोलांते ए रिश्ते,
कपले प्रेम बण कइ ई समाइते ए रिश्ते।
टोड़णे बेलिए कपले बि ना टूटते ए रिश्ते,
सुख-दुख जोड़ हें सात असे ए रिश्ते।
कपले धुप त कपले शोलियार ए रिश्ते,
जिन्दगी पिछाण भो ए रिश्ते।
रिश्ती के अन्हि धागी ई ना टोड़े,
हंसि कइ गड़े लए अन्हि केआं मुँह ना मोड़े।
यक लिंगि उशकि कइ टूट घेन्ते ए रिश्ते,
तोउं लख करियल कोशिश, कदि ना जुड़ते ए रिश्ते।

चुटकले

1 डाक्टर: अगर तु में दवाइ बेलि ठीक भोई घियाल त तु मेन्धे की इनाम देन्ता?

मरीज: डाक्टर साहाब, अउं त गरीब मेहणु असा। अउं मेहणु के कब्र खनता। त तुं कब्र फ्री अन्तर खन देन्ता।

2 कोये बाड़े: हें कुआ अन्तर वैसे कोई कमी असी नोउ।

बस सद हसण वकत दान्त कुस्तुरे लगते।

कुई बाड़े: कोई गल नेई। ब्याह केआं बाद हें कुई तस हसण कोड़ी देन्ती।



शहीदे अखिरी बोके

सथिया गी घेई कइ ना बोलुण,

सद भाश कर कइ समझाण।

ई में हाल पुछिएल त आँखु फटाई छाण।

तोउं बि ना समझेल त उडरता जन हराल छाण।

भेण में हाल पुछिएल त शुन्नु हथ हरालुण।

भाई में हाल पुछाल त शुन्ने बहोड़ हराल छाण।

तोउं बि ना समझेल त शुखो फियुड़ हराल छाण।

में जुएली में हाल पुछिएल त शुन्नी बथ हराली छाण।

तोउं बि ना समझेल त उजड़ो जगा हराल छाण।

समाज में हाल पुछियाल त पीठ हराल छाण।

तोउं बि ना समझेल त अम्मरे तारे हराल छाण।

में दिलवर, तु में अतीत जाणणे बगैर रोली गा।

तुं कोउं भक्त या साथी थिया जे देशे लिए अमर भोई गा।



तुबारि मासिक पत्रिका

◆अस इ उम्मिद करूं लगो असे कि एण बाड़े रोज अन्तर सुआ मेहणु इस कम अन्तर साथोट देन्ते।

◆इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगी घाटि अन्तर पढ्ूं जे त भाषाई सुहलियत करण जे इ पत्रिका शुरु कियो असी।

◆तुबारि यक अवाणिज्यिक पत्रिका भो।

◆तुबारि पत्रिका कोई मेहणु, जनजाति, त संस्कृति गलती कढेण जे नेई छपाण लगे। अगर कोई ई सोचता बि त अस जिम्मेबार नेई।

◆छपाणे पेहे सोभ आर्टिकल दुई टाई पांगेई मेहणु हरालो असे। इ त खुली बोक असी कि पेहलि बार पांगवाड़ि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल्स ना मिले, या घाटि मेहणु के साथोट ना मिले त तुबारि पत्रिका कदी बि बंद भुई सकती।

◆कोई चीज छपां असी या नेई छपां जे तुबारि संपादकीय टीम पुरा अधिकार असा।

◆अस किलाड केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपुं सझाव ओर आर्टिकल्स रखुं जे सुविधा कियो असी।

◆अस सोबी पांगी मेहणु जे हात जोड़ कइ अनुरोध कते कि, तुस बि कोई अच्छा आर्टिकल, पुराणि या नोई कथा, कहावत, कविता, त नोई घीत (पागवाड़ी अन्तर) लिख कइ छपां जे हेंघे दिए।

तुबारि संपादकीय टीम

9418431531

9418429574

9418329200

9418411199

9418904168

9459828290

